

40 films curts – situaziuns d'emprender per uffants

■ (cp) La direziun da furmazion dal chantun Turiŕg ha lantschà in project cun il titel «Situaziuns d'emprender per uffants fin 4». Quel cuntogna 40 films curts che mussan co che l'uffant pitschen empra en il mintgadi. Quests films sa drizzan a geniturs ed ad ulteriuras persunas che s'occupan cun la tgira ed educaziun dals uffants pitschens. Ils films statan a disposiziun en 13 linguatgs – er en rumantsch – ed èn accessibels libramain sur ina pagina d'internet. Quest project, realisà cun partenaris privats, serra ina largia en la promoziun tempriva da l'uffant. Ils films intermedieschjan a moda simpla e clera co ch'ins po promover la savida dals uffants da pitschen ensi en il mintgadi.

Mintga uffant duai avair in bun cumenzament en la vita. Quai è l'intent principal da la strategia da la direziun da furmazion dal chantun Turiŕg. Cun il project «Situaziuns d'emprender per uffants fin 4» s'avischina ella a questa finamira, ha la cussegliera governativa *Regine Aeppli*, directura da furmazion, declerà en la conferenza da medias.

40 films – co promover l'uffant fin 4 en il mintgadi: 40 films curts

Il project cuntogna 40 films curts che mussan co ch'ils geniturs pon promover lur uffants ils emprims onns da lur vita. Per quai na dovri betg acziuns extraordinarias: Chaschuns d'emprender sa dattan adina puspè durant il di, en situaziuns nunspectacularas, nua che l'uffant fa scuvertas ed empra da giugond: cun gidar en il lavuratori, da



Situaziuns d'emprender per uffants pitschens vegnan mussadas en 40 films curts. MAD

spaletschar carottas en cuschina u durant far gieus cun paltauns da plievgia.

Ils films «Situaziuns d'emprender per uffants fin 4» serran ina largia. I na dat betg in meglier medium per intermediar a moda directa e bain chapibla co ch'ins po promover ils pitschens gia fitg baud. Perquai duain ils films esser accessibels vastamain. Sin via directa u indirecta en discussiun cun persunas professionalas: Ils films duain cuntanscher uschè blers geniturs e persunas da contact cun uffants pitschens sco pussaivel. Els statan a disposiziun en ils quatter linguatgs uffizials svizzers (tudestg, franzos, talian e rumantsch) sco er en nov ulteriurs linguatgs: albanais, arab, englais, portugais, serb-croat-bosniac, spagnol, tamil, tigrinya e tirc.

Accessibels libramain

Ils films èn accessibels per tuts libramain sur

la pagina d'internet www.uffants-4.ch e pon vegnir utilisads en tut las domenas da l'educaziun d'uffants pitschens: en la cussegliaziun da mammas e babs, en la cussegliaziun d'educaziun, en canortas d'uffants pitschens, famiglias dal di u gruppas da giu.

Ils films «Situaziuns d'emprender per uffants fin 4» sa basan pedagogicamain sin il «Rom d'orientaziun per la furmazion, educaziun e tgira dals uffants pitschens en Svizra» ch'è vegnì lantschà il 2012 da la Rait tgira d'uffants svizra e da la Cumissiun naziunala svizra per l'Unesco. Mintga film s'occupa cun in tema specific ch'è cuntegnì entaifer il rom d'orientaziun.

La produziun dal film è vegnida procurada da *Heidi Simoni*, directura da l'Institut per l'uffant Marie Meierhofer. *Margrit Stamm*, professura emeritada per ciencias d'educaziun ed anteriura manadra dal Center per la furmazion da l'uffant pitschen, ha cusseglià la direziun da furmazion scientificamain.

Finanzia è il project vegnì dal fond da lottaria dal chantun Turiŕg e da la Jacobs Foundation, da la Fundaziun Mercator Svizra e da la Fundaziun Viktor Dürrenberger. Senza quest sustegn na fiss il project betg vegnì realisà.

L'Uffizi dal servetsch social chantunal dal Grischnun sustegna il project.

www.kinder-4.ch
www.enfants-4.ch
www.bambini-4.ch
www.uffants-4.ch
www.children-4.ch